



## Gaschtronomie wo? Mir hän si do!

Wotsch in Oberwil emol schigg go ässe,  
du das kasch komplett vergässe,  
laufsch vo Bäiz zu Bäiz bisch unentschlosse,  
überall e Schild: „sorry mir hän gschlosse“.

Dunkli Hüüser und lääri Gasse, bärguf- bärgab,  
käini Lüt nur e schwarzi Katz lauft d Stroos durab,  
das isch kei Szene us eme Horrorfilm,  
das ischs Bäizeschtärbe in Oberwil.

In dr Ziegelei e Rindersteak go schlemme,  
im Ochse e Spargelrisotto bschtelle,  
die Zyte sind verbi und chömme nüm,  
defür griegsch bim Chräisel di Dürüm.

E Trüffelbärlauchsüppli mit Biilag, denn Riesecrevette am Spiess,  
e Rindsfilet an Morchelsauce mit Nudle und Gmies,  
jetzt hör ändlig uf, bisch eigentlich bsässe,  
Ich gang by dene Pryse doch nit ins Viva go ässe.

Unseri drei Bäizekönige: dr Rolli de Däni und dr Cello,  
wo ebbis kasch ässe und tringge – biggobello,  
die drei Bäizer sin vo Afang unseri Vorbilder gsi,  
für 10 Joor Rambazamba-Fescht bi Bier und Wy.

Gordonbleu gits nüm im Reschtaurant Pöschtli,  
mit italiänischem Wyy macht me dört jetzt pröschтли,  
Nello wirt nume wyter e so, blib mit bäide Bäi uf de Ärde,  
denn chasch de vierti Bäizekönig vo Oberwil wärde.

Dr Rolli de Däni und dr Cello wirt scho sit Joore in Oberwil,  
sie göhn mit guetem Bischpiel vora, ihne wirs nie zviel,  
au bi uns d`Spezi mit dr Fasnachts-Bar uf em Waage,  
het sit 10 Joor nur Äin - nämlig dr Benji - s`sage.

De Schwane-Wirt macht si Lade zue,  
sit em Januar schpielt är blindi Chue“,  
Achim was wodsch du i dere Bäiz im Bäumlhof,  
dört verdinsch du s Gäld nämlig nüm im Schlof,  
Drum e Tipp vo uns: loss dir öbbis sage,  
chum an der Fasnacht zu uns uf de Waage,  
übernimm unsi Waage-Bar – und loss di go,  
In 10 Joor chasch di au bi uns pensioniere lo.

Dr Ochsewirt isch pläite und d Ziegelei isch zue,  
do hilft kei deubele und blöds Getue,  
de Lättiwirt schloft für immer im Ligi-Schtuel i,  
und äins isch sicher - e Döner go ässe - das los i si,  
gli muesch in d`Stadt ebbis go schnabuliere,  
ich sag do muesch nid lang dra umeschstudiere,  
mir d'Spezi göhn halt in d`Schigge am Schtamm-Tisch go feschte,  
und gäbe zwei drei Runde Gin -Tonic zum Beschte,  
s chunt alles guet das isch unser Befund,  
mir mache immer Fasnacht, egal was chunt.